



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԱՐԴՅՈՒՆԱՀԱՆՈՂ ՃՅՈՒՂԵՐԻ  
ԹԱՓԱՆՑԻԿՈՒԹՅԱՆ  
ՆԱԽԱՁԵՌՆՈՒԹՅՈՒՆ

ԲԱՑ ՏՎՅԱԼՆԵՐԻ  
ՔԱՂԱՔԱԿԱՆՈՒԹՅԱՆ  
ՀԱՅԵՑԱԿԱՐԳ

դեկտեմբեր, 2017թ.

Արդյունահանող ճյուղերի թափանցիկության նախաձեռնությանը (ԱՃԹՆ) անդամակցության հանձնառությունը, որն ստանձնեց Հայաստանի Հանրապետությունը 2015 թվականի հուլիսի 28-ին ՀՀ վարչապետի կողմից արված պաշտոնական հայտարարությամբ, նպատակ ունի ապահովել երկրի հանքարդյունաբերության ոլորտի թափանցիկ և հաշվետու կառավարումը:

ԱՃԹՆ-ի ստանդարտի ներդրման արդյունքում նախատեսվում է հավաքագրել, մշակել և լայն

հասարակությանը

հասանելի դարձնել ոլորտին առնչվող մեծածավալ տեղեկատվություն:

Այդ տեղեկատվության

բովանդակությունը պետք է որոշվի ԱՃԹՆ-ի

բազմաշահառու խմբի



(ԲՇԽ) կողմից՝ ԱՃԹՆ-ի ստանդարտի պահանջների, ԱՃԹՆ-ի ազգային առաջնահերթությունների և ազգային համատեքստի համաձայն:

Այդուհանդերձ, ԲՇԽ-ն ընդունում է, որ անգամ բովանդակապես հարուստ և արդի տեղեկատվության մշակմամբ ու տրամադրմամբ հնարավոր է, որ չապահովվի վերջնական կարևորագույն նպատակը, այն է՝ տեղեկատվության հանրամատչելիության և լայն կիրառման արդյունքում ոլորտի վերաբերյալ իրազեկվածության մակարդակի բարձրացումն ու բարեփոխումների իրականացումը:

Ուստի, իրական թափանցիկություն ապահովելու տեսանկյունից ԲՇԽ-ն կարևորում է ոչ միայն տեղեկատվության բովանդակային հարցերը, այլև դրա հասանելիության ապահովման ձևն ու միջոցները:

Հիմք ընդունելով վերոգրյալը՝ սույն փաստաթղթով ՀՀ ԱՃԹՆ ԲՇԽ-ն սահմանում է Հայաստանում ԱՃԹՆ-ի իրականացման շրջանակում բաց

տվյալների սկզբունքի իրականացման սկզբունքները և հայտնում իր հանձնառությունը հետևողական լինելու դրանց իրականացմանը:

Սկզբունքը կիրառելի է ԱՃԹՆ-ի շրջանակում հրապարակային տվյալների և տեղեկատվության համար՝ համաձայն Հայաստանի Հանրապետության Սահմանադրության, Հայաստանի Հանրապետության միջազգային պայմանագրերի, Հայաստանի Հանրապետության օրենսդրության, ԱՃԹՆ-ի ստանդարտի և սույն հայեցակարգի:

Սկզբունքի կիրառումը դիտարկվում է ԱՃԹՆ-ի տարեկան զեկույցների հրապարակմանը զուգընթաց և ԱՃԹՆ-ի շրջանակներում հաշվետու կազմակերպություններին չի պարտավորեցնում կիրառել այն, սակայն, տվյալներ հրապարակելիս, ԱՃԹՆ-ի շահագրգիռ կողմերը խրախուսվում են առաջնորդվել բաց տվյալների սկզբունքով:

**ԱՃԹՆ-ի համատեքտում բաց տվյալներն այն տվյալներն են, որոնք կարող են ազատորեն օգտագործվել, վերաօգտագործվել և տարածվել յուրաքանչյուրի կողմից՝ պահպանելով հեղինակային իրավունքները:**

## **Բաց տվյալների սկզբունքի կիրառման վերաբերյալ ԱՃԹՆ-ի ստանդարտի պահանջները**

*ԱՃԹՆ-ի ստանդարտի 7.1-ին պահանջը* սահմանում է, որ բազմաշահառու խումբը պարտավոր է՝

- համաձայնության գալ ԱՃԹՆ-ի տվյալների հասանելիության, հրապարակման և վերաօգտագործման հստակ քաղաքականության վերաբերյալ: Խրախուսվում է իրականացնող պետությունների կողմից ԱՃԹՆ-ի հրատարակումը բաց լիցենզիայով և օգտագործողների իրազեկումն այն մասին, որ տեղեկատվությունը կարող է վերաօգտագործվել առանց նախնական համաձայնության:

- ապահովել ԱՃԹՆ-ի զեկույցի հասանելիությունը բաց տվյալների ձևաչափով (xlsx, csv, docx)՝ առցանց և հանրայնացնել դրա հասանելիությունը:

*ԱՃԹՆ-ի ստանդարտի 7.2-րդ պահանջը* խրախուսում է ԲՇԽ-ին ապահովել ԱՃԹՆ-ի զեկույցի մեքենայալնթեոնելիությունը և ԱՃԹՆ-ի զեկույցների ու տվյալների ֆայլերի կողավորումը կամ նշումն այնպես, որ հնարավոր լինի տեղեկությունները համեմատել հանրության համար հասանելի այլ տվյալների հետ՝ ընդունելով ԱՃԹՆ-ի խորհրդի կողմից հաստատված ԱՃԹՆ-ի տվյալների ստանդարտները:

## **Նպատակը**

ԱՃԹՆ-ի շրջանակում հավաքագրված տեղեկությունների բաց տվյալների սկզբունքին համապատասխան հրապարակման նպատակը Հայաստանի հանքարդյունաբերության ոլորտում ավելի մեծ թափանցիկությունը, ԱՃԹՆ-ի նպատակների իրականացումը, ինչպես նաև մասնակցային կառավարումը, նորարարությունը և կայուն զարգացումը խթանելն է:

Բաց տվյալների սկզբունքին համապատասխան ԱՃԹՆ-ի տեղեկատվության հասանելիության ապահովումը կարող է անհատներին, քաղաքացիական հասարակությանը, լրատվամիջոցներին, գործարարներին և գիտակրթական հաստատություններին իրազեկել հարքարդյունաբերության ոլորտի մասին և ձևավորել տեղեկացված բանավեճի հարթակ:

## **ԱՃԹՆ-ի բաց տվյալների սկզբունքները**

Սույն հայեցակարգը սահմանում է ԱՃԹՆ-ի շրջանակում հավաքագրված տվյալների հրապարակման հիմնական սկզբունքները: Յուրաքանչյուր հաշվետու ժամանակաշրջանում ԲՇԽ-ն որոշում է կայացնում ԱՃԹՆ-ի ազգային զեկույցում ներառվող տվյալների շրջանակի, ինչպես նաև այդ տվյալների՝ բաց տվյալների ձևաչափով հրապարակման վերաբերյալ՝ համաձայն սույն հայեցակարգի:

**Տվյալների ամբողջականությունը.** ԱՃԹՆ-ի շրջանակում հրապարակված տվյալները պետք է լինեն հնարավորինս ամբողջական: Պետք է հրապարակվեն նաև ելակետային տվյալները (raw data), եթե դա չի հակասում օրենսդրությանը: Հրապարակվում են նաև ելակետային տվյալները բնութագրող մետատվյալները (metadata)՝ ներառյալ հաշվարկների համար օգտագործված մեթոդաբանության և բանաձևերը: ԲՇԽ-ն որոշում է, թե որ տվյալներն են ենթակա հրապարակման:

**Տվյալների աղբյուրները.** պետք է ներկայացվեն տվյալների աղբյուրները, ինչպես նաև որտեղից և ինչպես են այդ տվյալները ձեռք բերվել: Սա հնարավորություն կտա օգտագործողին համոզվելու, որ տեղեկատվությունը ձեռք է բերվել և արձանագրվել պատշաճ կարգով:

**Տվյալների արդիականությունը.** ԱՃԹՆ-ի շրջանակում հավաքագրված տվյալները պետք է ողջամիտ ժամկետում և առանց անհիմն ուշացումների հասանելի դառնան հանրությանը: Առաջնահերթ է այն տվյալների պատեհաժամ հրապարակումը, որոնց օգտակարությունն էապես կախված է ժամանակային գործոնից:

**Տվյալների մատչելիությունը.** ԱՃԹՆ-ի կողմից հրապարակված տեղեկատվությունը պետք է հնարավորինս մատչելի լինի՝ փնտրելու, գտնելու և ներբեռնելու տեսանկյունից:

**Մեքենայարնթեռնելիությունը.** տվյալներ ներկայացնելու որոշ ձևաչափեր ավելի հեշտորեն են ընթերցվում ծրագրերի և մեքենաների կողմից: Հետևաբար, տեղեկատվությունը պետք է հրապարակվի այդպիսի ձևաչափերով (օրինակ, xls, csv, xml կամ docx ձևաչափերը):



**Տվյալների ոչ խտրական օգտագործումը.** յուրաքանչյուր անձ պետք է հասանելիություն ունենա ԱՃԹՆ-ի շրջանակում հրապարակված տեղեկատվությանը՝ առանց ինքնության գրանցման և տվյալների օգտագործման համար հիմնավորում ներկայացնելու պահանջի:

**Տվյալների կայունությունը.** տվյալները պետք է հասանելի լինեն երկար ժամանակահատվածի ընթացքում: Սա նշանակում է, որ տվյալները պետք է պահպանեն հասանելիությունն առցանց արխիվներում: Հայաստանի ԱՃԹՆ-ի պաշտոնական կայքը պետք է ապահովի տվյալների պահպանման և հասանելիության կայունությունը:

**Տվյալների օգտագործման բաց լիցենզիան.** ԱՃԹՆ-ի շրջանակում հրապարակված տեղեկատվությունը կարող է ազատորեն օգտագործվել յուրաքանչյուրի կողմից, սակայն, Հայաստանի ԱՃԹՆ-ին հղում կատարելով:

**Տվյալների անվճար օգտագործումը.** ԱՃԹՆ-ի ազգային զեկույցի շրջանակում տրամադրվող տեղեկատվությունը պետք է հասանելի լինի անվճար կարգով:

**Հետադարձ կապը.** հնարավոր դեպքերում ապահովել օգտագործողների հետադարձ կապի մեխանիզմներ՝ անհրաժեշտության դեպքում ապահովելու համար տվյալների որակի շարունակական բարելավումը:

## **Գործողությունները**

ՀՀ ԱՃԹՆ-ի ազգային քարտուղարությունը և ՀՀ ԱՃԹՆ-ի ԲՇԽ-ն ԱՃԹՆ-ի ազգային նպատակներն իրականացնելու համար աշխատելու են իրենց գործունեության, ՀՀ ԱՃԹՆ-ի աշխատանքային ծրագրերի իրականացման, ԱՃԹՆ-ի ազգային զեկույցների հրապարակման, ԱՃԹՆ-ի շրջանակում տեղեկատվության և տվյալների հասանելիության ապահովման ընթացքում առաջնորդվել սույն հայեցակարգով սահմանված բաց տվյալների սկզբունքներով, ինչպես նաև խրախուսել պատասխանատու պետական մարմիններին և այլ շահագրգիռ կողմերին համապատասխան

տեղեկատվություն հրապարակելիս նույնպես առաջնորդվել բաց տվյալների սկզբունքով:

ՀՀ ԱՃԹՆ-ի ազգային քարտուղարությունը և ՀՀ ԱՃԹՆ-ի ԲՇԽ-ն Հայաստանի ԱՃԹՆ-ի պաշտոնական կայքի (պորտալի) ստեղծման տեխնիկական առաջադրանքը կազմելիս և կայքի զարգացման աշխատանքներն իրականացնելիս առաջնորդվելու են բաց տվյալների սկզբունքներով ու հետևողական են լինելու, որ կայքում ներկայացված տեղեկատվությունն օգտագործողի համար լինի մատչելի՝ փնտրելու, գտնելու, օգտագործելու և ներբեռնելու տեսանկյունից: